

**Ulloq 4. juni 2018 Niaqornaarsummi nalliuttorsiorpaluttumik  
katerisimaarnermi Julius Jeremiassenip sølviusumik Nersornaaserneqarnerani  
Inatsisartut Siulittaasuata Hans Enoksenip oqalugiaataa.**

Asasara Julius,

Nuannaarutigeqaara illit qaaqusatillu sølviusumik Nersornaaserneqarnissannut maanga atuarfiup inersuaani nalliuttorsiorpaluttumik katerisimaarnermut tikilluaqqusinnaagassi. Julius Jeremiassen taamatut nersorniarneqarputit sivisuumik tunniusimallutillu inuussutissarsiornikkut, aalisarnerup iluani Niaqornaarsummilu najukkami qinikkatut, suliniuteqarsimanerit pissutigalugu.

Inatsisartut Siulittaasoqarfiata sølviusumik Nersornaaserpaatsit piffissami sivisuumi annertuumillu qinikkatut aalisartutullu nersortarialimmik suliaqarsimanerit maligassiuisimanerillu pissutigalugu.

Inuusuttunnguullutilli aalisartutut piniartutullu inuussutissarsiuteqalersimavutit nunaqarfinni nunallu sinnerani maligassiuilluarsimallutit.

Tuberkuloseqaraluarlutit pujortuleerartaarnissaq suliniutigisimavat kingusinnerusukkullu aamma 42 fodsilimmik raajarniutitaarlutit.

Suli ullumikkumut 82-nik ukioqaraluarlutit inuussutissarsiutit attappat, 2013-milu 75-76-nik ukioqaralutit Niaqornaarsuup fabrikkiani tunisaqanerpaatut nersornaaserneqaralutit.

Inuusuttuunnguullutilli naalakkersuinerimik suliaqarnermi eqeersimaarlutit sulisimavutit, ilaatigut kommunalbestyrelsimi ukiut 14-it ilaasortaasimallutit, kommunit nammineersinnaanerit, kommunimi suliffissaqartitsinissaq, kiisalu nunami imaanilu avatangiisit illesorneqarnissaat pingaartissimallugit.

Kingusinnerusukkut Kangaatsiap kommunerisimasaani namminerisaminik kommuninngornissaanik anguniagarsi piviusunngortikkassiuk Kangaatsiap Kommunerisimasaani kommunalbestyrelsimut siulittaasunngorputit siulleg.

Julius, nunaqarfigisannut pingaaruteqaqaatit pingaaruteqarsimaqalutillu, tamanna aamma peqatigiiffilerinikkut takuneqarsinnaavoq, peqatigiiffinni arlalinni

ataqqinaammik ilaasortaaffeqaravit, piniartut peqatigiiffianni,  
illerfissarsiutileqatigiinnilu ilaasortaallutit.

Kunngikkormiut sivilisuumik sulisimanermut nersornaasiuttagaannik Kgl.  
Belønningsmedaljemik tunineqarsimanerit taamatuttaaq inuussutissarsiutinnut  
pimoorussininnut tatiginnassutsinnullu aamma uppersaataavoq.

Ingerlassimasatit amerlaqaat, matumani tamakkerlugit  
taakkartorsinnaagunangisannik.

Julius Jeremiassen, Nersornaat sølviusoq una maanna Namminersorlutik Oqartussat  
sinnerlugit ilinnut tunniutiligara inuiaqatigiit sinnerlugit ilinnut qujaniarnitsinnut  
ersiutaagili.

Qamanna pisumik pilluarit.